



Na osnovu člana 18. tačka m) Ustava Kantona Sarajevo, („Službene novine Kantona Sarajevo” br: 1/96, 2/96, 3/96, 16/97, 14/00, 4/01 i 28/04) Skupština Kantona Sarajevo na sjednici održanoj dana 15.07.2009. godine donijela je

ETIČKI KODEKS
POSLANIKA/ZASTUPNIKA U SKUPŠTINI
KANTONA SARAJEVO

UVODNI DIO

Član 1.

Etičkim kodeksom poslanika/zastupnika u Skupštini Kantona Sarajevo utvrđuju se etički principi i standardi ponašanja kojih treba da se pridržavaju izabrani zvaničnici u obavljanju njihovih dužnosti.

Član 2.

Predmet ovog Kodeksa su osnovni etički principi i principi standardizovanog ponašanja koje građani s pravom mogu očekivati od izabranih predstavnika u vršenju njihovih dužnosti, a u cilju održavanja i snaženja povjerenja građana prema Skupštini Kantona Sarajevo.

Član 3.

Cilj Kodeksa je da etičke obaveze i standardi ponašanja izabranih zvaničnika definirane ovim Kodeksom doprinesu da izabrani predstavnici zakonodavne vlasti obavljaju dužnost savjesno i odgovorno uz otvorenost i spremnost da odgovaraju javnosti za svoje odluke.

Član 4.

Pojam "izabrani zvaničnik" odnosi se na svakog poslanika/zastupnika koji ima mandat u Skupštini Kantona Sarajevo.

DIO II
OPŠTI ETIČKI PRINCIPI

Član 5.

- (1) Izabrani zvaničnici obavljaju dužnost u skladu sa Ustavom, zakonom i Poslovnikom o radu Skupštine Kantona Sarajevo.
- (2) U obavljanju svojih dužnosti, izabrani zvaničnici djelovat će isključivo u javnom interesu, a





ne u ličnom, niti u interesu pojedinaca ili grupe pojedinaca radi postizanja direktne ili indirektne koristi i zalagati se za ljudska prava i slobode.

Član 6.

Izabrani zvaničnici obavljat će svoje dužnosti savjesno i odgovorno uz naglašenu otvorenost i spremnost da odgovaraju javnosti za svoje odluke, djelovanja i ponašanja.

Član 7.

Prilikom obavljanja svojih dužnosti, izabrani zvaničnici uvažavat će prava i ovlaštenja drugih političkih i izabranih zvaničnika, državnih službenika i zaposlenika, suzdržavajući se od podsticanja ili pomaganja da u izvršavanju povjerenih dužnosti i radnih obaveza krše uspostavljeni Kodeks ponašanja.

Član 8.

Izabrani zvaničnici treba da svojim ponašanjem nastoje održati i dalje jačati povjerenje javnosti u integritet Skupštine Kantona Sarajevo i neće poduzimati aktivnosti i mjere kojima bi se ugrozio ugled Skupštine i izabranog zvaničnika.

Član 9.

Izabrani zvaničnici ne smiju se finansijski, ni na bilo koji drugi način obavezivati prema licima i organizacijama izvan Skupštine Kantona Sarajevo koje bi mogle uticati na obavljanje njihovih službenih dužnosti. Povjerljive informacije koje dobiju u toku obavljanja svojih parlamentarnih dužnosti treba da koriste samo u vezi s tim dužnostima, a nikako s ciljem sticanja finansijske ili druge dobiti za sebe niti za druge.

Član 10.

Prilikom obavljanja javnih dužnosti, kao i prilikom javnih imenovanja, davanja preporuka za nagrade, članovi Skupštine Kantona Sarajevo treba da izaberu kandidate prema njihovim kvalitetima i sposobnostima.

DIO III
PONAŠANJE IZABRANIH ZVANIČNIKA

Član 11.

- (1) Izabrani zvaničnici poštovat će sve etičke principe i standarde ponašanja koje Skupština Kantona Sarajevo propiše i koji proizilaze iz opće prihvaćenih standarda parlamentarnog rada.
- (2) Izabrani zvaničnici će svojim ponašanjem uvijek štiti ugled Skupštine Kantona Sarajevo.
- (3) Izabrani zvaničnici naročito:





- a) su dužni redovno prisustvovati sjednicama Skupštine i skupštinskih radnih tijela. Odsustvo sa sjednice dozvoljeno je samo u opravdanim situacijama u skladu s Poslovníkom Skupštine Kantona Sarajevo;
- b) ne smiju napuštati sjednicu za vrijeme obraćanja predsjedavajućeg ili gosta;
- c) ne smiju koristiti izraze i riječi koje mogu vrijeđati ili omalovažavati drugoga i drugačijega, izraze i mimiku ili njihove sinonime, koji vrijeđaju ljudsko dostojanstvo i narušavaju dignitet Skupštine, te potiču na mržnju i nasilje.
- d) u svom radu isključit će bilo kakvu pristrasnost prema drugačijoj političkoj ideologiji, rasi, vjeroispovijesti, naciji, spolu ili drugim mogućim predrasudama;
- e) ne smiju govoriti protiv ličnosti, prekidati govornika, ni na drugi način narušavati tok sjednice, red u sali;
- f) treba da izbjegavaju davanje izjava koje nisu potkrijepljene dokazima;
- g) ne smiju sjediti ni stajati leđima okrenuti predsjedavajućem;
- h) ne smiju konzumirati alkohol i hranu u toku sjednice;
- i) ne smiju u toku sjednice čitati knjige, novine i publikacije koje nisu vezane za njihove parlamentarne dužnosti;
- j) ne smiju koristiti mobilne telefone ni laptope na način kojim se ometa tok sjednice;
- k) ne smiju razgovarati na sjednici osim ako je to neophodno, pod uslovom da ne ometaju tok sjednice;
- l) razgovor izabranih zvaničnika u hodniku ne smije biti toliko glasan da se njime ometa tok sjednice;
- m) u vrijeme održavanja sjednica, te na drugim javnim mjestima, gdje učestvuju kao predstavnici Skupštine Kantona Sarajevo, izabrani zvaničnici dužni su biti prikladno i uredno odjeveni.

DIO IV.
OBAVLJANJE DUŽNOSTI IZABRANIH ZVANIČNIKA

Zabrana korištenja ovlaštenja za vlastiti interes.

Član 12.

Izabrani zvaničnici neće obavljati svoje dužnosti ni koristiti njihove prednosti s ciljem ostvarivanja vlastitih direktnih ili indirektnih interesa.





Sukob interesa

Član 13.

Izabrani zvaničnici su dužni da se pridržavaju odredaba Zakona o sukobu interesa kao i drugih propisa koji regulišu nespojivost funkcije izabranog zvaničnika.

Član 14.

- (1) Izabrani zvaničnici poštivat će sve važeće propise koji se odnose na ograničenje istovremenog obavljanja dvije ili više nespojivih dužnosti.
- (2) Izabrani zvaničnici neće obavljati dužnosti koje podrazumijevaju nadzor nad vlastitom dužnošću izabranog zvaničnika ili koje bi sami trebalo da nadziru u svojstvu izabranog predstavnika.

Primjena ovlaštenja

Član 15.

Prilikom primjene svojih ovlaštenja, izabrani zvaničnici neće za sebe sticati bilo kakvu direktnu ili indirektnu prednost niti pojedincima i grupama pojedinaca davati prednost s ciljem sticanja direktne ili indirektno koristi.

Zabrana korupcije

Član 16.

- (1) Izabrani zvaničnici će se u obavljanju svojih odgovornih dužnosti suzdržati od bilo kakvog ponašanja koje bi se, prema važećem domaćem ili međunarodnom krivičnom zakonodavstvu, moglo okarakterizirati kao aktivno ili pasivno podmićivanje ili odstupanje od pravila Etičkog kodeksa.
- (2) Izabrani zvaničnici neće ni u kom slučaju u obavljanju svojih dužnosti primati ili davati neku naknadu, primati ili davati poklone, obećavati nagradu ili bilo kakvu drugu korist što se može okarakterisati kao podmićivanje po važećem zakonodavstvu a u vezi sa podržavanjem ili ne podržavanjem određenog prijedloga akta ili odluke.

Finansijska disciplina

Član 17.

- (1) Izabrani zvaničnici poštivat će budžetsku i finansijsku disciplinu kojom se garantira ispravno upravljanje javnim sredstvima na način regulisan zakonom.





- (2) Prilikom obavljanja svojih dužnosti, izabrani zvaničnici neće preduzimati radnje s ciljem nenamjenskog trošenja javnih sredstava i/ili grantova.

Prestanak dužnosti

Član 18.

Prilikom obavljanja svojih dužnosti, izabrani zvaničnici neće preduzimati mjere kojima će sebi osigurati profesionalnu prednost nakon prestanka mandata:

- a) u javnim i privatnim organima nad kojima su vršili nadzor za vrijeme obavljanja izabrane dužnosti;
- b) u javnim i privatnim organima s kojima su uspostavili ugovorni odnos za vrijeme obavljanja izabrane dužnosti;
- c) u javnim i privatnim organima koji su formirani za vrijeme njihovog mandata i na osnovu povjerenih ovlaštenja.

DIO V ODNOSI S JAVNOŠĆU

Član 19.

- (1) Izabrani zvaničnici odgovorni su prema svim građanima za vrijeme svog mandata.
- (2) Na opravdan zahtjev javnosti, detaljno će obrazložiti razloge za svaku odluku koju donesu i navesti sve faktore, naročito pravila i propise na kojima se odluka zasniva. Ako su te informacije povjerljive, objasniti će razloge njihove povjerljivosti.
- (3) Izabrani zvaničnici će s dužnom pažnjom odgovarati na sva pitanja javnosti u vezi s obavljanjem njihovih dužnosti, razlozima za njihove postupke i funkcioniranjem radnih tijela u njihovoj nadležnosti.
- (4) Podsticat će i promovisati svaku mjeru kojom se povećava otvorenost prema javnosti.

DIO VI ODNOSI SA OSOBLJEM

Član 20.

- (1) U obavljanju svojih dužnosti, izabrani zvaničnici uvažavat će zaposlene, bez bilo kakvih predrasuda.
- (2) Izabrani zvaničnici neće tražiti ni zahtijevati od zaposlenih da preduzmu ili propuste preduzeti mjere kako bi stekli direktnu ili indirektnu korist.





DIO VII
ODNOSI S MEDIJIMA

Član 21.

- (1) Izabrani zvaničnici iskreno će i u potpunosti odgovarati na sve zahtjeve medija za davanje informacija vezanih za obavljanje njihovih dužnosti, ali neće pružiti informacije koje se odnose na privatni život drugih izabranih zvaničnika ili trećeg lica.
- (2) Prilikom davanja informacija za medije izabrani zvaničnik rukovodit će se usvojenim stavovima Skupštine Kantona Sarajevo i radnih tijela u čijem radu je učestvovao, a u slučaju neslaganja sa stavovima radnih tijela ili Skupštine, može javnost upoznati i o vlastitom stavu.
- (3) Izabrani zvaničnici ohrabrivat će i podsticati sve mjere koje imaju za cilj unapređenje medijskog praćenja njihovih aktivnosti i odgovornosti pri obavljanju njihovih dužnosti i funkcioniranja institucije za čiji rad su odgovorni.

DIO VIII
OBLAST NADZORA

Član 22.

Izabrani zvaničnici će s dužnom pažnjom poštivati sve mjere u skladu sa zakonom, a kojima se nalaže objelodanjivanje direktnih ili indirektnih ličnih interesa, drugih mandata, dužnosti i poslova, kao i promjena u imovinskom stanju (imovinskom kartonu).

Član 23.

- (1) Prilikom obavljanja svojih dužnosti, izabrani zvaničnici neće sprečavati ili ometati provođenje bilo koje mjere nadzora koju budu vršili nadležni organi
- (2) Izabrani zvaničnici poštivat će svaku pravosnažnu odluku koju takvi organi donesu.

DIO IX
MJERE ZA KRŠENJE KODEKSA

Član 24.

Za povrede Etičkog kodeksa izabranih zvaničnika mogu se izreći sljedeće korektivne mjere:

- a) pismena opomena,
- b) novčana kazna i





c) javna opomena s objavom u sredstvima javnog informiranja.

Član 25.

- (1) Za blaže povrede Etičkog kodeksa prekršiocu se izriče pismena opomena.
- (2) Za teže povrede Etičkog kodeksa izriče se novčana kazna i javna opomena.
- (3) Novčana kazna može se izreći jednokratno u visini do 50 % mjesečnog paušala izabranog zvaničnika.
- (4) Javna opomena s objavom u sredstvima javnog informisanja izriče se na način da se, nakon njenog izricanja, objavljuje na prvom narednom zasjedanju Skupštine Kantona Sarajevo i sredstvima javnog informisanja, oglasnoj tabli Skupštine Kantona
- (5) Javna opomena stavlja se na web-stranicu Skupštine Kantona Sarajevo u trajanju od 30 dana.

Žalbena procedura

Član 26.

- (1) Na izrečene mjere Etičkog vijeća Skupštine Kantona Sarajevo, izabrani zvaničnik može uložiti žalbu Administrativnoj komisiji Skupštine Kantona Sarajevo.
- (2) Administrativna komisija će uz saglasnost Etičkog vijeća Skupštine Kantona Sarajevo propisati postupak izricanja mjera iz člana 24. ovog kodeksa, uključujući i žalbeni postupak.

DIO X.
ETIČKO VIJEĆE

Član 27.

Za provođenje i praćenje primjene Kodeksa i izricanje mjera iz člana 24. ovog kodeksa nadležno je Etičko vijeće Skupštine Kantona Sarajevo.

Član 28.

Etičko vijeće prati i nadziranje ponašanje izabranih zvaničnika te prati i analizira primjenu Kodeksa, razmatra prijave kršenja kodeksa, vrši postupak provjere i predlaže sankcije i mjere ukoliko se ustanovi da je došlo do povrede odredbi Kodeksa te obavještava javnost o svom radu.





Član 29.

Prijavu o povredi odredbi Kodeksa može podneti svaki član Skupštine Kantona Sarajevo, kolegij i predsjedavajući klubova poslanika/zastupnika, predsjedavajući klubova naroda, građani.

Predstavke i žalbe podnose se pismeno u potpisanom obliku Etičkom vijeću.

DIO XI
ZAVRŠNE ODREDBE

Član 30.

Svi gramatički izrazi upotrebljeni u ovom tekstu odnose se na oba spola.

Član 31.

Izabrani zvaničnici bit će upoznati sa sadržajem ovog kodeksa , te potpisati izjavu kojom izražavaju spremnost da u svom radu postupaju u skladu sa odredbama ovog Kodeksa.

Član 32.

Etički kodeks stupa na snagu danom objavljivanja u "Službenim novinama Kantona Sarajevo".

Broj:01-05-21315/09
15.07.2009. godine
S A R A J E V O

PREDSJEDAVAJUĆI
SKUPŠTINE KANTONA SARAJEVO

dr. Denis Zvizdić

